

Ufhusen 14. Jänner 2012

Ändlich isches so wit gsi. Am Samschti 14. Jänner hei mir üs am 16:00 im Üebigsruum z Huttu versammelt. Wiso so früech? Mir hei no müesse es paar Presäntli bechläbere. S Schminkeam het du afe afo schminke. So s erschte mou geit das immer chli lenger. Isch aber gloub nid schlächt cho... Da ig die erschti bi gsi, isches bi mir chli komisch use cho aber das chunnt de scho. Jo nachem Schminke hets du die erschte Instruktionen gäh wenn, wie, was, wo. S beschte isch jo gsi wo mir s neue T-Shirt hei übercho!!! Geseht auso Wäutklass us!!! Danke euch zwene fürs organisiere und so!!! Super sach. S Logo isch eifach dr Hammer. Ja dr Presi u ig hei du när uf die 19:00 müesse z Ufhuse si fürs Apéro und s Würfle. Da ig vor 2ne Jahr nid so guet gwürflet ha, hani du ar Presidäntin dr Vortritt gloh. Ja mir hei du die 2. Uftrittszyt erwürflet. Ha das gar nid so schlächt gfunge. Am 21:05 isch üse Uftritt ir Turnhau gsi. Vorhär isch no s Monsterkonzärt gsi. Zersch jedi Gugge 2 Lieder und zum Schluss no aui zäme dr Fasnachtsmarsch. Dä sötte mir ize de auso wüerklich mou üebe... Mir chöi dä gloub immer no nid. Mou luege... ☺

Ja dr Uftritt isch us mire Sicht super gsi. Obschon i auso o dernäbeghornet ha. Für sone chliine Hufe hei mir freiechli Volume. Auso vor Lutsterchi här. I gloube es het aune Spass gmacht. Zum Znacht hets Schwinswürschtli und Brot gäh. I ha das auso no gärn. Besser aus Risotto isch das allemal. Jo was gits no z verzeue?? Nachem Uftritt hei mir auso ho chli gfeschtet. Isch huere luschtig gsi. Es paar hei freud gha es anders Mitglid z erchlüpfe... Die wos agöh wüsse vo was dasi Redä. Es si Füddle mit Monsterchläber bechläbt worde. Mir hei tanzet und gsunge. Es sich eifach e guete Fasnachtsuftakt gsi. Nadisnah si du d Sümpferlis gäge hei zue. Für e Zuestang woni ha gha bini auso erstuunt gsi, wie guet das ig mi abgshminkt ha gha... ☺ Es Mitglid vo üs isch du schiins am drü bim Instrumäntedepot gweckt worde. Si heis ömu probiert. Ersch s iigrife vore angere Person hets du fertig bracht dä jenig usem Koma z holä. Es heig schiins wunderbar gschlofe. Hei si doch öppe 10 min. porbiert es z wecke. D Kamera isch du im Delirium o vergässe gange. Zum glück isch du die wider füre cho. Si sig schiins im Ghüderchübu gsi und öpper wo ufgrumt u putzt het, het die du wider usegfischtet. Huere schwein gha sägeni do ume. Het auso luschtigi Videos gäh. Ha scho dörfe glüüsle. ☺

Jo viu meh chani do gar nüme derzue säge. Es isch eifach e glungnige Obe gsi. Ize hei mir 2 Wuche Pouse und när geits de am 28. Jänner i Kanton Zug uf Neuheim. Das wird sicher o wider e super obe. Wünsche e gueti Zyt und bis gli...

16.01.2012, Stefanie Schär